

**Fundargerð aðalfundar Rauða kross Íslands  
haldinn á Hótel Nordica laugardaginn 15. maí 2010**

**Setningarvörp**

*Anna Stefánsdóttir, formaður Rauða kross Íslands*

Anna bauð gesti velkomna og kynnti sérstaka gesti, Georg Habsburg formann ungerska Rauða krossins og eiginkonu hans, Ericu Habsburg, og bauð þau velkomin til Íslands.

Að því loknu minntist hún látinna félagi, sérstaklega Guðjóns Magnússonar en hann sat í stjórn Rauða kross Íslands í 14 ár, þar af var hann formaður félagsins í tíu ár og gegndi einnig margvíslegum trúnaðarstörfum innan Alþjóðasambands Rauða krossins og Rauða hálfmánans. Bað Anna fundargesti að rísa úr sætum og minnst genginna félagi.

Anna sagði Rauða krossinn gegna stóru hlutverki í þeim miklu áföllum sem dunið hafa á íslensku þjóðinni undanfarið og minntist í því sambandi á nýútkomna skýrslu um hvar kreppir að í samfélaginu sem unnin var á vegum Rauða krossins. Sagði Anna skýrsluna mikilvægt mælitæki á það hvert Rauði krossinn þurfi að beina kröftum sínum næstu árin en niðurstöður skýrslunnar sýna að fimm hópar standa höllustum fæti í samfélaginu; atvinnuleitendur, barnmargar fjölskyldur og einstæðir foreldrar, innflytjendur, öryrkjar og börn og ungt fólk sem skortir tækifæri. Einnig sagði hún okkur hollt að leiða hugann að þeim skyldum sem við höfum gagnvart þeim sem um sárt eiga að binda í öðrum löndum sem þegar í alþjóðasamfélagi.

*Sýnt var myndband um grundvallarmarkmið Rauða kross ins og frá því þegar mannlegir krossar voru myndaðir í Rauða kross vikunni.*

Að því loknu sagði formaður aðalfund Rauða krossins árið 2010 settan.

**Viðurkenningar til sjálfbóðaliða og verkefna**

Anna Margrét Pétursdóttir, Kvennadeild Reykjavíkurdeildar

Björk Nóadóttir, Akureyrardeild

Margrét Kristinsdóttir, Kvennadeild Reykjavíkurdeildar

Þórdís Sigtryggsdóttir, Kvennadeild Reykjavíkurdeildar

Föndurhópur kvennadeildar Reykjavíkurdeildar

Hafnarfjarðardeild fyrir stuðning við hælisleitendur

Rangárvallasýsludeild fyrir vel unnin störf í kjölfar náttúruhamfara

**Aðalfundarstörf skv. 6.gr. laga Rauða kross Íslands:**

**1. Stjórnin athugar kjörbréf fulltrúa deilda og leggur fram til úrskurðar fundarins.**

Mættir eru 108 aðalfulltrúar frá 44 deildum, Lagt var til að ekki þyrfti að lesa upp nöfn allra fundarmanna, og var það samþykkt. Kjörbréf voru síðan borin upp og samþykkt.

**2. Fundarstjóri kosinn:**

Stefán Eiríksson, lögreglustjóri á höfuðborgarsvæðinu.

Fundarstjóri tók við fundarstjórn, úrskurðaði að til aðalfundar hafi verið boðað í samræmi við lög félagsins, farið hafi verið yfir kjörbréf deilda og fundurinn samþykkt þau. Skoðaðist fundurinn því lögmætur.

**3. Fundarritarar kosnir:**

Kristján Bjarnason, svæðisfulltrúi á Vesturlandi og Þóra Kristín Ásgeirsdóttir, svæðisfulltrúi á höfuðborgarsvæðinu.

**4. Fundargerð síðasta aðalfundar lögð fram til umræðu og staðfestingar.**

Enginn tók til máls um fundargerðina og var hún samþykkt með lófataki.

**5. Skýrsla stjórnar Rauða kross Íslands um síðasta starfsár lögð fram til umræðu.**

*Anna Stefánsdóttir, formaður Rauða krossins*

Anna sagði frá fundum stjórnar og hlutverki, en allir stjórnarmenn eru sjálfbóðaliðar. Stjórnin hefur fundað 12 sinnum frá síðasta aðalfundi í Vík í Mýrdal árið 2009, en auk þess var haldinn einn vinnufundur þar sem farið var yfir stefnu félagsins og forgangsröðun verkefna til ársins 2020.

Anna sagði hlutverk stjórnar að fara með sameiginlega hagsmuni alls félagsins og auðvelda deildum störf sín og jafnframt gæta þess að þær, og þar með félagið í heild, starfi í samræmi við grundvallarmarkmið, lög og stefnu Rauða krossins.

Því næst fór Anna stuttlega yfir verkefni félagsins árið 2009 en benti á ítarlegri umfjöllun í ársskýrslu Rauða kross Íslands sem aðgengileg er á vef félagsins.

Síðasta ár reyndist mörgum þungt í skauti og þörfin fyrir aðstoð Rauða krossins jókst eftir því sem á árið leið. Rauðakrosshúsið var opnað 5. mars 2009 til að bregðast við afleiðingum efnahagshrunsins og veita aðstoð þeim sem áttu um sárt að binda í kjölfar þess. Um eitt hundrað sjálfboðaliðar tóku þátt í daglegum störfum í húsinu. Í upphafi samþykkti stjórn Rauða krossins að húsið yrði rekið til maíloka árið 2010, og er það mat stjórnar að verkefnið sé betur komið nær þeim sem nýta það og í höndum deilda.

Rauði krossinn brást við þegar stóraukið atvinnuleysi fór að herja á landsmenn með ýmsum virkniúrræðum fyrir atvinnulausa, á eigin vegum eða í samstarfi við aðra aðila í heimabyggð s.s. sveitarstjórnir, Vinnuálastofnun og fleiri.

Mikil aukning var á beiðnum um aðstoð fyrir síðustu jól frá barnmörgum fjölskyldum og þeim sem minna mega sín. Þá studdu deildir við bakið á efnaminni fjölskyldum með námskeiðahaldi og dægrastyttingu fyrir börn og ungmenni.

Símtölum í hjálparsímann 1717 fjölgaði um 8% frá árinu 2008 til 2009. Um tvö þúsund fleiri símtölum var svarað árið 2009 en árið áður, en hjálparsíminn hefur gegnt mikilvægu hlutverki við að miðla upplýsingum til atvinnulausra og þeirra sem minna mega sín um úrræði og leiðir til aðstoðar. Þá gegnir hjálparsíminn sífellt veigameira hlutverki sem upplýsingasími almennings á hættutímum. Hjálparsíminn hélt upp á fimm ára starfsafmæli 5. mars síðastliðinn.

Fatasöfnun Rauða krossins úthlutaði fatnaði til rúmlega 1800 einstaklinga árið 2009 sem er aukning um 300 manns frá árinu 2008. Magn fatnaðar sem barst til fatasöfnunar árið 2009 var um fjórðungi minna en árið 2008 þrátt fyrir velheppnað kynningarátak síðastliðið sumar þar sem prentuðum pokum frá fatasöfnun var dreift inn á öll heimili landsins. Starfsemi fatasöfnunar verður með hverju árinu stærri þáttur í fjáröflun félagsins en fatasöfnun lagði hjálparsjóði til kr.38.000.000.- árið 2009.

Þá sagði Anna stuttlega frá umhverfisstefnu Rauða krossins sem samþykkt var á aðalfundi félagsins í Vík í Mýrdal árið 2009 en Rauði kross Íslands varð þar með fyrsta landsfélagið til að marka sér stefnu í umhverfismálum í ljósi loftslagsbreytinga og hlýnunar jarðar.

Ríflega 1000 manns skráðu sig sem Liðsauka í kynningarviku sem haldin var um allt land 12. – 17. október 2009 og talsverð aukning varð einnig á skráningum sjálfboðaliða í hefðbundin sjálfboðastörf í kynningarvikunni.

Rauða krossins var getið 287 sinnum í fjölmiðlum sem starfa á Íslandi á árinu 2009. 16% af fréttaflokkningi fjallaði um þátttöku í alþjóðastarfi og 84% fréttu voru af innanlandsstarfi félagsins.

Rauði krossinn lét vinna skýrslu um eðli og umfang mansals á Íslandi. Niðurstöður sýna að Ísland er ekki einungis gegnumstreymisland fyrir mansalsflutninga til Evrópu og megi gera ráð fyrir að tugir einstaklinga sem dvelja á Íslandi í lengri eða skemmri tíma falli undir skilgreiningu um mansal.

Niðurstaða úr könnun sem URKÍ gerði sýndi að þátttaka í sjálfboðastarfi Rauða krossins hefur aukist hjá yngri kynslóðinni en um 30% sjálfboðaliða er undir þrítugu meðan aðeins um 6% úr þessum aldurshópi sat í stjórnnum deilda. Í kjölfar niðurstaðna var hvatt til þess að fjölga ungu fólki í stjórnnum deilda og gekk það eftir.

Rauði kross Íslands hélt úti öflugum neyðar- og þróunarstarfi á helstu áherslusvæðum sínum þrátt fyrir óhagstæðar efnahagsaðstæður og niðurskurð af hendi hins opinbera til þróunarmála. Má meðal annars nefna aukið samstarf við palestínska Rauða hálfmánann, uppbyggingarstarf með fórnarlömbum eyðniveirunnar í Malaví og fleira.

Rauði kross Íslands lagði til upplýsingar í skýrslu á vegum Alþjóðasambands Rauða kross félaga um áhrif bankakreppunnar í Evrópu. Landsfélög um alla Evrópu finna fyrir aukinni ásókn í mannúðaraðstoð á sama tíma og tekjur dragist saman.

Helmingi meira magn af ungbarnapökkum var framleitt árið 2009 en árið 2008, en alls voru framleiddir um 4.500 ungbarnapakkar á síðasta ári. 2.000 pakkar voru sendir til Hvíta Rússlands og 2.500 pakkar til Malaví.

Að lokum þakkaði formaður sjálfbóðaliðum það blómlega og mikla starf sem unnið var á vegum Rauða krossins á síðasta ári innanlands sem utan og sagði Rauða krossinn búinn að sanna stoðhlutverk sitt í hamförum undanfarið bæði varðandi viðbrögð við afleiðingum efnahagshrunsins og eldgossins í Eyjafjallajökli. Þá sagði Anna velvilja og jákvæðni almennings gagnvart Rauða krossinum þakkarverðan.

Enginn tók til máls um skýrsluna.

## **6. Endurskoðaðir reikningar síðasta reikningsárs lagðir fram til umræðu og atkvæðagreiðslu.**

*Einar Sigurðsson, gjaldkeri stjórnar Rauða kross Íslands, lagði fram reikninga félagsins fyrir árið 2009 og skýrði þá.*

Gjaldkeri lagði í upphafi áherslu á nauðsyn þess að sýna ráðdeild í rekstri sem hefði tekist ásættanlega í rekstri Rauða kross Íslands árið 2009.

Sagði hann eftirtektarvert að samsetning tekna Rauða kross Íslands væri að breytast, kassatekjur hafi dregist saman að raunvirði um 21% frá árinu 2008 og einnig fjármunatekjur, en aukning á frjálsum framlögum og söluhagnaður, aðallega af rekstri fatasöfnunar og Rauða kross búða bæti þá tekjulækkun að verulegu leyti. Efnahagur félagsins sé því traustur þrátt fyrir efnahagsþrengingar og samdrátt í þjóðfélaginu.

Tekjur Rauða kross Íslands á árinu 2009 skiptast eftirfarandi: fjármunatekjur 13%, tekjur af söfnunarkössum 39%, tekjur vegna sjúkraflutninga 8%, samningsbundin verk við stjórnvöld 12%, frjáls framlög 18% og sölustarfsemi 10%.

Hlutfallsskipting gjalda er eftirfarandi:

Innlend verkefni 38%, útbreiðsluverkefni og fjáröflun 10%, alþjóðleg verkefni 26%, sjúkraflutningar 17% og önnur verkefni 9%.

## **Umræður um ársreikninga.**

*Sveinn kristinnsson formaður Akranesdeildar.*

Sveinn gerði athugasemd við varasjóð félagsins og taldi að tími væri kominn til að lækka sjóðinn og veita í auknum mæli til verkefna.

Kristján Sturluson framkvæmdastjóri benti á í svari til Sveins að þegar hafi verið gengið á sjóðinn til verkefna. Árið 2008 tók stjórn Rauða krossins ákvörðun um að sjóðurinn yrði ekki verðbættur svo hann hefur ekki hækkað að raungildi. Sagði Kristján 20 milljónir króna hefðu verið ætlaðar úr sjóðnum í einstaklingsaðstoð á árinu en tekist hefði að afla tekna vegna þess. Hins vegar hefði stjórn ákveðið að 30 milljónir króna færu til eflingar virkniverkefna. Það sé fyrirséð að sjóðurinn muni minnka á næstu árum

Fleiri tóku ekki til máls um ársreikninga félagsins og voru þeir að lokinni umfjöllun bornir undir atkvæði og samþykktir samhljóða.

*Kaffihlé*

## **Samþykkt var að liðir 7-8 í dagskrá væru teknir sameiginlega**

### **7.-8. Framkvæmda- og fjárhagsáætlun næsta starfsárs lögð fram til umræðu**

*Kristján Sturluson, framkvæmdastjóri.*

## **Framkvæmdaáætlun**

Framkvæmdastjóri sagði að samdráttur í tekjum félagsins væri fyrirséður á komandi ári og honum yrði mætt með forgangsröðun verkefna, sparnaði og aðhaldi í rekstri. Óhjákvæmilegt væri að það kæmi að einhverju leyti niður á verkefnum en áætlun næsta árs miðaði að því að halda í horfinu með verkefni eins og kostur er.

Kristján sagði styrk og reynslu Rauða krossins nýtast vel í viðbrögðum félagsins við þeim samdrætti sem blasi við samfélaginu á næstunni. Mikilvægt sé að laga verkefni að þörfum samfélagsins, að verkefni séu í takt við

tíðarandann og nýtist best þeim sem standa verst að vígi en staða þeirra sem stóðu verst fyrir kreppu hefur versnað til muna auk þess sem stóraukið atvinnuleysi hafi aukið á vanda stórs hóps í þjóðfélaginu.

Þá fór Kristján yfir helstu verkefni í framkvæmdaáætlun næsta árs út frá fjórum yfirmarkmiðum í nágildandi stefnu félagsins sem gildir út árið 2010:

*(1. Kynna og breiða út grundvallarmarkmið hreyfingarinnar og mannúðarhugsjón hennar)*

Unnið markvisst að því að Rauði krossinn haldi orðspori sínu sem aðili sem bregðist fljótt og vel við þegar á þarf að halda.

Áfram verði unnið að því að kynna þá þjónustu og verkefni sem í boði eru á vegum Rauða krossins innanlands en jafnframt verði haldið á lofti þeim skyldum sem félagið hefur á alþjóðavetvangi. Sagði hann ánægjulegt að kynningarstarf deilda á sínum heimasvæðum væri almennt blómlegt í skólum, á vinnustöðum og meðal almennings. Nýútkomin skýrsla um hvar þrengir að í samfélaginu gæfi ákveðna mynd af ástandinu í samfélaginu og kæmi að góðum notum við skipulagningu verkefna næstu misserum.

Áfram verður lögð verður áhersla á að virkja atvinnulaust fólk í starfi Rauða krossins. Virkni-verkefnið „Ungt fólk til athafna“ sem ætlað er fyrir atvinnulaust fólk á aldrinum 16-24 ára, hefur tekist vel hjá þeim deildum sem hafa tekið þátt í því, en reynsla annarra þjóða sýnir að þessi hópur er berskjaldaðastur gagnvart áhrifum langtíma.

*(2. Efla neyðarvarnir og neyðaraðstoð vegna áfalla og hamfara)*

Rauðakrosshúsið í Borgartúni er mikivægt verkefni sem hefur komið mörgum til góða. Verkefni verður ekki í þeirri mynd sem það hefur verið frá og með næst hausti. Mat stjórnar Rauða krossins er að verkefnið sé betur komið í höndum deilda þar sem það megi flokka sem „nærumhverfis“ verkefni. Betra sé að deildir meti þörfina fyrir úrræði lík Rauðakrosshúsinu á sínum starfssvæðum.

Kristján sagði að viðbrögð vegna náttúruhamfara hérlendis og erlendis eðlis síns vegna ekki hægt að sjá fyrir í áætlanagerð. Sá þáttur hafi verið fyrirferðarmikill í starfi Rauða krossins undanfarið ár og nefndi hann sérstaklega hamfarirnar á Háítí og eldgos í Fimmvörðuhálsi og Eyjafjallajökli

Í viðbrögðum við neyð sagði Kristján fatasöfnun þjóða upp á fjölmörg tækifæri varðandi aðstoð við bágstadda með rekstri Rauða kross búða, fataúthlutun, skiptifatamörkuðum í leikskólum o.fl.

Þá hafi Hjálpasími Rauða krossins 1717 enn á ný sannað gildi sitt í neyðaraðgerðum og stuðningi við þá sem eiga erfitt en innhringingum fjölgaði umtalsvert á liðnu ári.

Samningur við stjórnvöld um rekstur sjúkrabíla rennur út í árslok 2010 og hefur stjórn Rauða krossins lýst yfir áhuga á að endurnýja þann samning. Enn hafa engar formlegar viðræður farið fram milli Rauða krossins og stjórnvalda. Sagði Kristján mikilvægt að við gerð nýs samnings verði haft að leiðarljósi að fyllsta öryggis og gæða sé gætt en jafnframt að beinn kostnaður félagsins við rekstur sjúkrabílasjóðs aukist ekki.

*(3. Draga úr félagslegri eingangrun og styrkja þróunarsamvinnu)*

Í umfjöllun um neyðar- og þróunaraðstoð félagsins sagði Kristján að hún yrði með svipuðu sniði og undanfarin ár en fyrirséð að efnahagsástand hér á landi komi til með að hafa áhrif á umfang starfsins.

Áfram verður unnið að því að efla verkefnið „föt sem framlag“ en það hefur vaxið að umfangi undanfarin ár.

Í því sem snýr að vinnu félagsins gegn félagslegri einangrun hefur starf heimsóknarvina skipað stóran sess í framkvæmdaráætlun félagsins. Markmiðið í stefnu félagsins um að allar deildir séu með heimsóknarvinaverkefni árið 2010 næst ekki en um 40 deildir eru með slíkt í sínum framkvæmdaáætlunum.

Niðurstöður könnunar „Hvar þrengir að?“ sýna að þörf fyrir öflugt starf með innflytjendum er enn til staðar og verður áfram unnið að því að efla það starf á komandi starfsári.

Starf með geðfötluðum og aðstandendum þeirra heldur áfram, en stuðnings- og sjálfshjálparhópar auk athvarfa fyrir geðfatlaða hafa sannað gildi sitt undir merkjum og stuðningi Rauða krossins.

Á sviði alþjóðlegrar aðstoðar vegur stuðningur við landsfélög í Afríku, sérstaklega sunnanverðri, og Palestínu þyngst þar sem helst er horft til stöðu barna. Aukin áhersla hefur verið lögð á skilvirkni verkefna og veitingu fjármuna til landsfélaga svo skjólstaðingar finni sem minnst fyrir minnkuðu fjármagni frá Íslandi til verkefna.

#### *(4. Rauði krossinn sé ávallt vel starfandi landsfélag)*

Kristján sagði fjölgun sjálfboðaliða hafa verið stöðuga ár frá ári og mikilvægt sé að samsetning sjálfboðaliða endurspegli þverskurð af samfélaginu. Nýlega náðist sá áfangi að félagsmaður númer 20.000 gekk til liðs við Rauða krossinn.

Mikilvægt er að hlutur ungs fólks fái aukið vægi í starfi deilda í samræmi við niðurstöður könnunarinnar „Hvar þrengir að?“. Þær sýna að fjöldi barna og ungmenna er afar berskjaldaður í dag og nauðsynlegt að skoða verkefni með tilliti hvernig best sé hægt að mæta því. Deildir hafi unnið ötulst starf við að fá fólk af yngri kynslóðinni til liðs við Rauða krossinn með öflugu og fjölbreyttu kynningarstarfi og samstarfi við URKÍ. Á síðasta ári vann URKÍ ötullega að aukinni þátttöku ungs fólks í starfi og stjórnun deilda með góðum árangri.

Kristján sagði ánægjulegt að sjá að fjáröflunarleiðir væru nú fjölbreyttari en áður sem kæmi til móts við minnkandi kassatekjur. Framlag tombólubarna hafi einnig aukist sem væri sérstakt ánægjulefni. 2. október verður gengið til góðs í þágu alnæmissmitaðra barna í Malaví. Í ljósi reynslunnar hafi þegar verið farið af stað með vinnu við að fara yfir hvað mætti betur fara í framkvæmd „Göngum til góðs“ og ætti afrakstur þeirrar vinnu að lita dagsins ljós í júníþyrjun.

#### **Fjárhagsáætlun**

Framkvæmdastjóri kynnti fyrir fundarmönnum sameiginlega fjárhagsáætlun landsskrifstofu og sjúkrabílasjóðs fyrir árið 2010, en áætlunin gerir ráð fyrir rekstrarhalla upp á tæpar 29 milljónir króna. Áætlunin verður endurskoðuð á miðju sumri og mun hún breytast vegna mikils kostnaðar við ófyrirséð verkefni innanlands og utan (t.d. jarðskálftinn á Haítí, eldgos í Fimmvörðuhálsi og Eyjafjallajökli og viðamikil verkefni um viðbrögð við kreppunni). Þó hallinn aukist líklega hafi einnig komið inn auknar tekjur m.a. vegna jarðskjálftans á Haítí en um 65 milljónir söfnuðust þar.

Kristján sagði nauðsynlegt að gæta aðhalds í rekstri félagsins vegna minnkandi tekna og dýrra verkefna sem ekki voru á áætlun. Stjórn Rauða krossins hafi rætt það að úthluta um 30 millj.úr varasjóði vegna sérstakra verkefna ársins 2010. Eftirspurn eftir einstaklingsaðstoð komi til með að aukast og ekki fyrirséð hvernig henni verði mætt varðandi fjármögnun.

Í umfjöllun um tekjur félagsins sagði Kristján talsverða minnkun á kassatekjum verða, ekki væri hægt að sjá fyrir hvað sú lækkan verði mikil, eins væri með aðra tekjuliði félagsins s.s. sölustarfsemi, samningsbundin verk við stjórnvöld, fjármunatekjur o.fl.

Að lokum sagði framkvæmdastjóri Rauða krossinn hafa staðið með sæmd undir þeim væntingum sem samfélagið gerir til félagsins um að bregðast fljótt og vel við þar sem kreppir að í samfélaginu og vera sú áreiðanlega og trausta stoð sem Rauði krossinn vill byggja sitt orðspor á. Það þurfi samt alltaf að gæta þess að vekja ekki meiri væntingar en hægt sé að bregðast við

#### **Umræður eftir áætlun**

*Bryndís Birgisdóttir frá Súgandafjarðardeild*

Spurði um staðla varðandi sjúkrabíla í tengslum við kaup á ákveðnum tegundum bíla.

Hvort halda mætti aðalfund annað hvert ár í sparnaðarskyni.

Hvort hægt væri að finna aðra tímasetningu fyrir „Göngum til góðs“, annað hvort á vorin eða snemma í september.

*Ingibjörg Lilja Diðriksdóttir formaður Kópavogsdeildar*

Hrósaði Rauða krossinum fyrir vel unnið starf, spurði á hverju áætlun um 40% minni innkomu af fjáröflun væri byggð og hvort einhverjar reglur væru um stærð varasjóðs félagsins og nýtingu hans á næstu árum.

*Svar Kristjáns Sturlusonar framkvæmdastjóra*

Staðlar eru bundnir í samningi við ríkið um búnað bíla við útboð. Ýmsar bílategundir eru ekki inni í útboði vegna mengunarstaðla.

Kannað hafi verið meðal deilda hvort endurskoða ætti tímasetningu „Göngum til góðs“. Vilji meiri hluta hafi verið fyrir því að ganga í októberþyrjun og hafi stjórn félagsins því samþykkt 2. október.

Akvörðun um aðalfund er bundin í lögum félagsins sem segja að hann skuli haldinn á hverju ári.

Lægri framlög til verkefna frá ríkinu skýra að stórum hluta mikla lækkan á áætlun um tekjur af fjáröflun. Hins vegar hefir raunin orðið að framlögin verða hærri.

Varasjóður lýtur reglum um hlutverk hans og stærð frá 1995. Fyrsta úthlutun úr sjóðnum var vegna snjóflóðanna á Flateyri. Ekki eru áætlanir um nýtingu sjóðsins, en viðmið er um að lagt sé í hann það sem úr honum er tekið. Aðstæður þjóði hins vegar ekki upp á að sjóðurinn verði bættur á þessu ári þannig að fyrirséð er að hann muni rýrna að verðgildi.

Stjórn félagsins hefur ákveðið að stefna og áætlun um nýtingu sjóðsins verði endurskoðuð í haust með tilliti til þeirra aðstæðna sem nú eru í þjóðfélaginu.

*Álfheiður Svana Kristjánsdóttir frá Akureyrardeild*

Spurði hvort til stæði að útbúa verklagsreglur um aðstoð til einstaklinga vegna aukinnar ásóknar í slíkt og um fjárveitingar vegna aðstoðar við fórnarlömb eldgossins í Fimmvörðuhálsi og Eyjafjallajökli.

*Sveinn Kristinnsson formaður Akranesdeildar*

Velti fyrir sér hvernig best er að bregðast við minni tekjum og hvatti til aukins samstarfs deilda við stofnanir og samstarfsaðila í bæjarfélögum.

*Hermann Guðmundsson stjórnarmaður í Reykjavíkudeild*

Vakti athygli á samdrætti í rekstri landsskrifstofu, þörfin hafi aldrei verið meiri en nú á öfluglu starfi og hvort ekki væri rétt að nota fé úr varasjóði félagsins til reksturs landsskrifstofu og starfsmannahalds.

*Ingibjörg Ásgeirsdóttir formaður Hafnafjarðardeildar*

Spurði um breytingar á rekstri Rauðakrosshússins og skipulags- og áherslubreytingar við flutning til deilda. Hvort fjármagn mundi fylgja verkefninu frá landsskrifstofu.

*Svar Kristjáns Sturlusonar framkvæmdastjóra*

Til eru reglur um einstaklingsaðstoð sem deildir geta haft til hliðsjónar. Þær þarf hins vegar að skoða reglulega. Gert er ráð fyrir aukakostnaði vegna eldgossins, ekki er vitað hver þróunin verður en Rauði krossinn fær kostnað við hjálparstarf að miklu leyti endurgreiddan frá ríki og sveitarfélögum. Einnig hafi félaginu borist styrkir og framlög ætlaðir fórnarlömbum eldgossins.

Rauða kross deildir hafa og geta verið í forsvari vegna orðspors um frumkvæði til samvinnu og samstarfs við aðra aðila um verkefni.

Þrátt fyrir strangar aðhaldsaðgerðir er markmið félagsins að halda úti sömu þjónustu landsskrifstofu miðað við verri aðstæður og minni innkomu. Góður og samhentur hópur starfsmanna félagsins hefur auðveldað aukið starf við versnandi aðstæður. Sagðist framkvæmdastjóri vera stoltur af því að vinna með þessum starfsmannahópi og andinn væri góður enda hefði Rauði krossinn hlotið viðurkenningu VR sem eitt af fyrirtækjum ársins bæði 2009 og 2010. Rekstur Rauðakrosshússins er í endurskoðun. Deildir þekkja best hver þörfin er á hverjum stað fyrir úrræði í anda hússins. Mikilvægt er að leita í enn frekara mæli samstarfs við sveitarfélög og aðila í heimahéraði í þessum málaflokki.

*Hádegisverðarhlé*

## **9.Lagabreytingar**

*Stefán Yngvason stjórnarmaður Rauða krossins gerði grein fyrir tillögunni.*

Ein tillaga til lagabreytingar, breytingar á 4. grein laga, 3. málsgrein. Sjá lagabreytingu.

### **3. málsg. 4. gr. laganna hljóði svo:**

**Félagar eru skráðir í eina deild Rauða kross Íslands að eigin vali. Félagar sem hafa greitt árgjald síðasta árs í deildinni fyrir 1. janúar hafa fullan atkvæðisrétt og kjörgengi á aðalfundi sinnar deildar. Stjórn deildar, eða kjörnefnd þar sem hún hefur verið skipuð, getur vikið frá þessu ákvæði ef næg framboð í nýja stjórn hafa ekki borist fyrir aðalfund. Heiðursfélagar og félagar sem eru undanþegnir greiðslu árgjalds hafa fullan rétt á aðalfundi. Félagi getur sagt sig úr Rauða krossi Íslands skriflega hvenær sem er.**

*Stefán fór yfir greinargerð sem fylgdi lagabreytingunni.*

“Komið hefur í ljós að nógildandi 3. málsgrein 4. greinar laga Rauða kross Íslands er ekki nægilega skýr. Dæmi eru frá fyrri tíð um að einstaklingar hafi verið skráðir í fleiri en eina deild í senn og lögin gefa í sjálfu sér kost á því að félagar geti fært sig milli deilda og jafnvel tekið þátt í aðalfundarstörfum í fleiri en einni deild á sama starfsári. Það getur þó ekki talist eðlilegt í samtökum sem byggja á jafnræði og lýðræði enda gæti sami einstaklingur jafnvel verið

kosinn í stjórnir tveggja eða fleiri deilda og haft með því óeðlilega mikil áhrif í félaginu, m.a. á tilnefningar fulltrúa á aðalfund. Einnig gæti hópur einstaklinga farið á milli aðalfunda deilda sem oft eru fremur fámennir. Þótt Rauða kross félögum sé ekki ætlaður vilji til slíkrar starfsemi er ástæða til að taka af öll tvímæli um að slíkt sé ekki mögulegt. Ofangreindri tillögu er ætlað að taka á þessum vanda, bæði með ákvæði um að félagi geti aðeins verið skráður í eina deild Rauða krossins í senn og að hann hafi greitt árgjald fyrir tilskilinn tíma. Dæmi eru um að deildir haldi fundi í janúar og þess vegna er ákvæðið um greiðslu félagsgjalda miðað við 1. janúar.

Það er hinsvegar þekkt í minni deildum að erfiðlega getur gengið að fá fólk til að taka þátt í stjórnarstörfum. Stundum hefur tekist að finna fólk á síðustu stundu sem hefur ekki verið starfandi í Rauða krossinum en gefur þó kost á sér til stjórnarsetu í viðkomandi deild, jafnvel formennsku. Þess vegna er lagt til að stjórn deilda eða kjörnefnd hafi heimild til að víkja frá ákvæðinu um greiðslu félagsgjalda fyrir 1. janúar ef nýir félagar vilja koma til liðs við deild þar sem hörgull er á stjórnarfólki. Fundasrstjóri lætur greiða til athvaðagreiðslu.” *Samþykkt samhljóða.*

#### **10. Kosning formanns samkvæmt 7. gr.**

*Katrín Matthíasdóttir fulltrúi í kjörnefnd gerði grein fyrir tillögu nefndarinnar.*

Kjörnefnd leggur til að Anna Stefánsdóttir verði endurkjörin sem formaður til næstu tveggja ára. Ekki gáfu fleiri kost á sér og var Anna því endurkjörin einróma með dynjandi lófaklappi.

#### **11. Kosning annarra stjórnarmanna og varamanna samkvæmt 7. gr.**

*Katrín Matthíasdóttir, fulltrúi í kjörnefnd.*

Kosning fimm stjórnarmanna. Kjörnefnd leggur til að Anh-Dao Tran, Ester Brune, Sigríður Magnúsdóttir og Gunnar Frímansson verði endurkjörin í stjórn félagsins til tveggja ára. Kjörnefnd leggur auk þess til að Ólafía Eyrún Sigurðardóttir frá Hveragerði verði kjörin aðalmaður í stjórn til tveggja ára. Ekki gáfu fleiri kost á sér og var tillaga kjörnefndar samþykkt með lófaklappi. Varastjórn. Kjörnefnd leggur til að Gísli Pálsson, verði endurkjörinn fyrsti varamaður og annar varamaður verði Ágústa Ósk Aronsdóttir, formaður URKÍ. Ekki voru önnur framboð og var tillaga kjörnefndar samþykkt með lófaklappi .

#### **12. Kosning tveggja skoðunarmanna.**

*Katrín Matthíasdóttir, fulltrúi í kjörnefnd*

Kjörnefnd leggur til að Ólafur Reimar Gunnarsson úr Garðabæ og Sigrún Camilla Halldórsdóttir frá Ísafirði verði kjörin skoðunarmenn til eins árs.

Samþykkt með lófaklappi.

#### **13. Umræður um helstu stefnumál og markmið**

*Anna Stefánsdóttir, formaður RKÍ.*

Anna kynnti endurskoðun á stefnu Rauða kross Íslands og nýrri stefnu Alþjóðasambands Rauða krossins og Rauða hálfmánans.

Þrjú ár eru síðan stefna Rauða kross Íslands 2010 var endurskoðuð. Nú hefur Alþjóðasambandið samþykkt stefnu til 2020 og er Rauði kross Íslands að vinna að endurskoðaðri stefnu sem svipar til stefnu Alþjóðasambandsins en einnig er stefnan endurskoðuð í ljósi breyttra aðstæðna í samfélaginu.

Stjórn hefur skipað vinnuhóp um mótun nýrrar stefnu og sitja í honum fulltrúar frá hverju svæði, einn frá stjórn URKÍ, tveir fulltrúar úr stjórn, einn utan félags og framkvæmdastjóri. Hópurinn hefur fundað tvisvar sinnum.

Fulltrúar hópsins munu hitta sjálfboðaliða á hverju svæði fyrir sig til þess að ræða mótun nýrrar stefnu í haust. Drögum að nýrri stefnu verður skilað til stjórnar í febrúar á næsta ári og lokadrög verða kynnt á formannafundi mánuði síðar. Loks verður stefnan lögð fyrir aðalfund félagsins í maí 2011.

Í stefnu Alþjóðasambandsins 2020 er lögð áhersla á einingu innan Rauða kross hreyfingarinnar. Eining og samstaða eru grundvöllur að öflugu starfi hreyfingarinnar. Það mun einnig verða haft að leiðarljósi í stefnu Rauða kross Íslands til 2020.

Að lokum þakkaði Anna svo aðalfundarfulltrúum fyrir að sýna sér traust til áframhaldandi formennsku.

*Ingibjörg Lilja Dðriksdóttir formaður Kópavogsdeildar*

Spurði út í verklag og þá hvort ekki væri gert ráð fyrir að leggja drögin fyrir deildir og spurði hvort það hefði gleymst. Sagði hún miklu máli skipta að deildir fái drögin að stefnunni til umræðu.

Svar Önnu var að drög að stefnunni verði að sjálfsgöðu send til deilda til umfjöllunar á meðan á ferlinu stæði.

## **Staða Rauða krossins þegar þrengir að í samfélaginu**

*Gunnar Frímannsson, varaformaður Rauða kross Íslands.*

Gunnar ræddi afleiðingar bankahrunsins og áhrif þess á starfsemi Rauða krossins. Ekki væri allt neikvætt í tengslum við efnahagsþrengingarnar, m.a hefði hlutfallsleg aukning orðið á atvinnuþáttöku kvenna, vinnutími karla hefði styst og væri að nálgast viðmið nágrennalandanna. Minnti hann á að þrátt fyrir að þrengingar væru hér á landi þá væru aðstæður víða erlendis mun verri.

Sagði hann fækkun starfa bitna ekki bara á Íslendingum heldur hafi gríðarlegar framkvæmdir dregið til Íslands fjölda fólks af erlendum uppruna sem hafi í miklum mæli misst vinnuna undanfarið.

Þessir einstaklingar þurfi margir hverjir aðstoð Rauða krossins, vegna fordóma og bágrar stöðu.

Rauði krossinn setti af stað Rauðakrosshúsið og efldi Hjálparsmann 1717, m.a. að fenginni dýrmætri reynslu finnska Rauða krossins, en hún er að nauðsynlegt sé að bregðast við strax varðandi úrræði fyrir atvinnulausa. Rauði krossinn þurfi að vinna að málefnum barna og ungmenna, reyna að vera til taks og fara ekki í manngreinaralit. Miklu máli skipti að forgangsraða verkefnum og þekkja takmörk sín. Að lokum sagði Gunnar Rauða krossinn hafa vakið athygli á hópum einstaklinga sem þurfi á stuðningi að halda sem enginn annar væri að sinna.

## **Ávarp formanns Ungverska Rauða krossins**

*Georg Habsburg, formaður Rauða krossins í Ungverjalandi.*

Georg byrjaði á því að óska formanni til hamingju með endurkjörið og þakka fyrir boðið til Íslands. Hann sagði frá stöðunni í Ungverjalandi, en landið var fyrir kreppu að kljást við slæmt efnahagsástand sem átti rætur í erfiðu pólitísku umhverfi, veikum gjaldmiðli og auðveldum aðgangi að neyslulánum. Alþjóða gjaldeyrissjóðurinn hafi ásamt Evrópusambandinu veitt Ungverjalandi lán með því skilyrði að ríkistjórnin færi í umfangsmiklar sparnaðaraðgerðir og dregið yrið gífurlega saman í rekstri.

Fjölskyldur hafi átt erfitt með að greiða hita, rafmagn, leigu eða afborganir af lánum. Georg sagði ungverska Rauða krossinn hafa hvatt ríkisstjórn landsins til að ræða við banka um að gera samninga við fólk um aðgerðir til að auðvelda því veturinn. Starfsemi Rauða krossins átti ekki auðvelt uppdráttar, þar sem fyrirtæki og stofnanir þurfa að greiða virðisaukaskatt af öllu sem gefið er til félagsins í formi styrkja. Fólk átti ekki sparið til þess að nota síðar, svo ekkert var auka þegar það missti vinnuna. Langar raðir mynduðust þar sem verið var að gefa mat. Rauði krossinn kom á fót „jólaveinaverksmiðjum“ um allt land, þar sem safnað var leikföngum, hreinlætisvörum og fötum sem síðan voru gefin til þeirra sem þurftu fyrir jólin. Haldnir voru Gala tónleikar þar sem ágóði af miðasölu rann til kaupa á hreinlætisvörum og næringarríki fæðu fyrir börn í fátækari hverfum Budapest. Georg sagði frá rafmagnsfyrirtæki sem hafi rukkað fólk of mikið fyrir rafmagnsnotkun og gefið hluta umframfjárins til ungverska Rauða krossins. Hann sagði efnahagsástand í Ungverjalandi vera að komast í jafnvægi og meiri ástæða en áður til bjartsýni.

*Kaffihlé og sýning heimildarmyndar um Konukot*

## **14.Önnur mál.**

*Sveinn Þorsteinsson frá Víkurdeild*

Þakkaði fyrir hönd Víkurdeildar þeim sem stóðu að ferðinni sem börnum í Víkurskóla var boðið í af Ungu fólki til athafna. Las hann upp eftirfarandi þakkarbréf:

Kæru vinir!

Við undirrituð viljum senda ykkur bestu þakkir fyrir allan ykkar góða stuðning og hjálp á síðustu vikum. Við höfum fengið töluvert öskufall yfir okkur, sem getur verið erfitt á köflum, þótt bjartsýni komi alltaf aftur með sólinni/rigningunni og það er frábært að finna samhug og velvilja fólks alls staðar að af landinu. Ferðin sem nemendum Víkurskóla hefur verið boðið í er kærkomin tilbreyting í þessum aðstæðum okkar.

Með bestu kveðjum,  
börn og unglingar í Víkurskóla  
foreldrar / forráðamenn  
starfsfólk og kennarar  
skólastjóri

*Árni Þorkelsson Rangárvallasýsludeild.*

Árni færði landsfélaginu þakkir fyrir viðurkenningu sem deildin fékk og flutti kveðju og þakkir stjórnar deildarinnar fyrir hlýhug þeim deildum sem lagt hafa lið í baráttu við náttúruöflin. Sagði hann gott til þess að vita að eiga svo



gott bakland sem raunin væri. Óskaði hann nýrri stjórn til hamingju með starfið og þakkar fráfarandi stjórn fyrir gott starf.

*Ágústa Ósk Aronsdóttir formaður URKÍ*

Ágústa byrjaði á að kynna nýja stjórn sem kjörin var á aðalfundi 23 apríl. Hún kynnti einnig sumarþúðir URKÍ sem verða í Alviðru í ágúst og hvatti deildir til þess að kynna sér þær vel og senda ungt fólk í þær.

*Magnús Halldórsson Álftanesdeild.*

Magnús þakkaði fyrir ánægjulegan og góðan fund og sagði reynslu sína af starfi innan Rauða krossins einkar ánægjulega og lærdómsríka. Lýsti hann sérstaklega yfir ánægju sinni með að heyrja af því hvað mikil áhersla væri lögð á að efla starf með ungu fólki.

## **Fundarslit**

*Anna Stefánsdóttir formaður Rauða kross Íslands*

Anna þakkaði fyrir ánægjulegan og árangursríkan aðalfund og Pálín Helgadóttur fráfarandi stjórnarmanni fyrir ánægjulegt og gott samstarf. Einnig þakkaði hún fundarstjóra og riturum störf sín.

Anna sagði verkefni Rauða krossins krefjandi á öllum tímum og enn frekar á tímum sem þessum þar sem unnið væri að neyðarvörnum á tvönnan hátt, annars vegar vegna efnahagsástands og hins vegar vegna jarðhræringa í Eyjafjallajökli. Fundurinn biði fyrir kærar kveðjur til íbúa á gossvæði.

Anna kvað stór verkefni bíða félagsins, eins og kom fram í kjölfar könnunarinnar „Hvar þrengir að?“ en eitt af þeim verkefnum væri að aðstoða ungt fólk sem býr við bágt ástand og/eða erfiðar aðstæður.

“Við getum ekki gert allt, við þurfum að forgangsraða eftir verkefnum hverju sinni og nú enn frekar en áður”, sagði formaður.

Anna greindi frá að *Göngum til góðs* yrði á dagskrá í haust en það væri eitt af mikilvægustu verkefnum félagsins, ekki einungis sem fjárfloflun heldur líka til þess að kynna Rauða krossinn og það starf sem hann stendur fyrir. Markmiðið væri að heimsækja öll heimili landsins.

Þá sagði Anna tvær deildir hafa sýnt áhuga á að halda aðalfund 2011 og fljótlega verði ákveðið hvar fundurinn verður. Formaður þakkaði að lokum starfsmönnum landsskrifstofu fyrir þeirra framlag til fundarins og fundargestum fyrir góðar umræður og gott framlag til málefna í málstofum og sagði aðalfundi Rauða kross Íslands slitið kl. 17.05.

## **Niðurstöður úr málstofum aðalfundar 2010**

### **Fjármál**

*Fundarstjóri: Gunnar Frímannsson*

*Framsögumenn: Einar Guðbjartsson varaformaður Kjósarsýsludeildar*

*Halldór Snjólaugsson formaður Fáskrúðsfjarðardeildar og í stjórn Rauða krossins*

### **Framsaga og umræður**

Í máli framsögumanna kom fram að þörf væri á að setja verklagsreglur um neyðarsjóð Rauða krossins og að kostnaður við súkraflutninga hafi aukist meðan tekjur hafi dregist saman. Einar velti fyrir sér hvort skipting kassatekna ætti að vera óbreytanleg eða hvort vikið ætti að vera með tilliti til verkefna. Sagt var frá góðri reynslu deilda á Austurlandi af samstarfi við aðra varðandi neyðaraðstoð til einstaklinga. Þá var þeirri spurningu velt upp hvort kostnaður við innheimtu félagsgjalda væri of mikill og hvort hægt væri að finna aðrar og ódýrari leiðir við innheimtu þeirra. Einnig hvort ætti að sameina minni deildir eða hvort það myndi leiða til brotthvarfs sjálfboðaliða úr verkefnum en deildir væru sterkar á misjöfnum sviðum.

Bent var á að með minnkandi kassatekjum og áframhaldandi kreppu þyrfti Rauði krossinn að finna fjölbreyttari leiðir til fjármögnunar, en samsetning tekna hefur breyst talsvert undanfarin misseri.

Rætt var um að staða deilda væri mjög misjöfn. Sumar deildir fá ekki úthlutað kassatekjum vegna of mikillar peningaeignar (meira en tvöfaldar kassatekjur) meðan aðrar hafa gengið mismikið á sjóði sína til reksturs og verkefna og eiga erfiðara með að fjármagna verkefni. Passa þarf að ekki komi upp samkeppni milli deilda og landsskrifstofu um fjármögnun þar sem deildir og landsskrifstofa eru oft að leita til sömu fyrirtækja um styrki. Spurning hvort hægt sé að hafa eftirlit með því (hugmynd um að setja stöðu styrkumsókna til fyrirtækja á vefinn). Beiðnum um neyðaraðstoð hefur fjölgað mikið og er lítið eftir hjá sumum deildum til annarra verkefna. Taka þarf tillit til mismunandi fasts rekstrarkostnaðar deilda sem er oft svipaður óháð stærð deilda og erfitt fyrir minni deildir

sem hafa ráðið starfsmann að snúa til baka vegna samdráttar þar sem eðli og umfang verkefna breytist mikið með tilkomu starfsmanns.

Hvernig förum við að fjármagna starfsemi okkar? Eigum við að taka okkur Ungverja til fyrirmyndar, eigum við að ganga á varasjóði félagsins eða forgangsraða verkefnum?

### Niðurstöður

- Endurskoða þarf reglur um úthlutun kassatekna og taka meira tillit til mismunandi rekstrarkostnaðar deilda.
- Efla þarf samstarf minni deilda um verkefni.
- Fjárveitingar verði meira verkefnatengdar og meiri kröfur gerðar um árangurstengingu.
- Setja þarf skýrari verklagsreglur um neyðaraðstoð.
- Leita þarf fjölbreyttari leiða til öflunar fjár til verkefna Rauða krossins.
- Veita þarf deildum greiðari aðgang að varasjóði félagsins meðan ástandið er eins og það er.
- Hvernig viljum við sjá okkur í baksýnispeglinum þegar kreppunni lýkur? Viljum við sjá okkur með digra sjóði hafandi dregið saman í kreppunni?

### Alþjóðastarf

*Fundarstjóri: Jón Þorsteinn Sigurðsson*

*Framsögumenn: Herdís Sigurjónsdóttir stjórnarmaður Fatasöfnunar á höfuðborgarsvæðinu  
Nína Helgadóttir verkefnisstjóri á alþjóðasviði landsskrifstofu*

### Framsaga og umræður

Í máli framsögumanna kom fram að starfsemi fatasöfnunar hefur aukist mikið að umfangi undanfarin ár, meira er gert úr þeim verðmætum sem fara þar í gegn, magn fatnaðar sem berst til fatasöfnunar minnkar en tekjur aukast stöðugt ár frá ári. Rauða kross búðum hefur fjölgað, fataúthlutanir eru fleiri og ná nú til fleiri en áður m.a. fangelsa, meðferðarstofnana, lögreglu og einstaklinga. Hugmyndir eru uppi um að efla enn frekar samstarf við deildir og fyrirtæki á landsbyggðinni.

Söfnunarátakið „Notuð föt, nýtt hlutverk“ tókst vel og jókst magn í móttöku fatasöfnunar talsvert í kjölfarið.

Allur afrakstur af rekstri fatasöfnunar rennur í hjálparsjóð.

Alþjóðastarf Rauða krossins hefur ekki farið varhluta af efnahagsþrengingum og veikri gengisstöðu en skuldbindingar vegna verkefna erlendis eru í erlendri mynt sem hefur haft mikla kostnaðaraukningu í för með sér. Hafa starfsmenn alþjóðasviðs brugðist við með því að leita eftir samvinnu við önnur landsfélög og sótt í auknum mæli um styrki til verkefna í ýmsa sjóði innanlands og utan. Sparað hefur verið með því að lækka eftirlitskostnað þar sem því verður við komið og draga saman í verkefnum.

Allur fatnaður (skemmdur og ónýtur þar með talinn) sem berst til fatasöfnunar nýtist. Það sem ekki selst fer í endurvinnslu, en nýtingarmöguleikar á heilum fatnaði eru sífellt að aukast t.d. á markaði hjá deildum, í Rauða kross búðir, nýtist ungu fólki í hönnunarverkefni o.fl. Ýmsar hugmyndir eru uppi varðandi starf fatasöfnunar m.a. hvort hægt sé að auka verðmæti af fatasölu með því að flokka betur fatnað með tilliti til verðmætis (merkjafatnaður o.fl), finna leiðir til að virkja samfélagið, fá fyrirtæki til að vinna sjálfböðastörf í verslunum o.fl.

Stærsti kostnaðarliðurinn við þróunarsamvinnu Rauða krossins er utanumhald og kostnaður vegna sjálfböðaliðastarfa og laun starfsmanna malavíska Rauða krossins, fæðuöflunarverkefni og vatnsdælur til áveitugerðar, athvörf og aðstoð við börn í Malaví. Ungbarnapakkar hafa komið sér vel en farið að bera á þörf fyrir fatapakka fyrir eldri börn.

Áhersla í mörgum heilbrigðisverkefnum er að breytast og eru mörg verkefni í endurskoðun með tilliti til aukins samstarfs við önnur landsfélög.

### Niðurstöður

- Halda áfram að leita leiða til að auka verðmæti þess fatnaðar sem berst til fatasöfnunar
- Leggja áherslu á fatasöfnun sem landsverkefni í kynningum og starfi.
- Leita eftir auknu samstarfi við önnur landsfélög um alþjóðaverkefni og skipuleggja verkefni með hliðsjón af því.

## Verkefni með ungu fólki.

*Fundarstjóri: Stefán Yngvason*

*Framsögumenn: Gunnlaugur Bragi Björnsson formaður stjórnar URKÍ-R  
Ágústa Ósk Aronsdóttir, formaður stjórnar URKÍ*

### Framsaga og umræður

Í máli framsögumanna kom fram að miklu skiptir að huga vel að ungu fólki innan hreyfingarinnar, hvort sem það er að vinna með þeim eða fyrir þau. Þau Ágústa og Gunnlaugur bentu á að í samfélaginu í dag þrengir mjög að þessum hópi og er því enn mikilvægara en áður að huga vel að honum. Hvetja þau deildir til þess að nýta sér tækifærin til að vinna með ungu fólki sem er hægt með margvíslegum hætti. Þau nefndu þrjá þætti: 1. Vinna unnin af ungufólki, 2. Unnið með ungu fólki og svo 3. Unnið fyrir ungt fólk. Rauði krossinn getur unnið að öllu þessu.

Þau bentu á tæki og tól sem hægt væri að nota og eru þau meðal annars:

Mannúð og menning.

Viðhorf og virðing

Sumarbúðir URKÍ

Mannúðarlög og mannréttindi

Kompás og Kompasito

Genfarsamningar, fara í menntaskóla í landinu

Samstarf við skóla

Úræði fyrir unga atvinnulausa

Alþjóðastarf – vinadeildir

Neyðarvarnir – skyndihjálp.

Börn og umhverfi (hét áður barnfóstrunámskeið).

Nokkur umræða var um hvernig ætti að hefja starfið. Gunnlaugur og Ágústa hvöttu deildir til þess að ræða við aðrar deildir sem eru að vinna að ungmennamálum, tala við URKÍ og svæðisstarfsmenn. Einnig hvöttu þau til meira samstarfs deilda. Mikilvægt að byrja snemma og nýta skólana. Jafnvel standa fyrir einhvers konar viðburðum og kynna starfið.

### Niðurstöður

URKÍ býður deildum upp á að koma með kynningar eða vera með í umræðum um ungt fólk. Þar sem mikið er í gangi þá er um að gera að fara í samstarf við björgunarsveitir, skáta og aðra aðila. Ná til krakka í gegnum skólana og bjóða upp á eitt verkefni til að byrja með, það þarf ekki að vera ungmennadeild, getur verið verkefni.

Að bjóða upp á verkefni sem höfða til ungs fólks og hlusta á það sem ungt fólk vill gera.

Muna eftir að byrja smátt og stækka svo jafnt og þétt.

Lögð verði áhersla á að styrkja Vinanet.

Nota Facebook.

Jafningarfræðsla skiptir mjög miklu máli þegar unnið er með ungu fólki.

## Verkefni með þeim sem höllum fæti standa vegna kreppunnar

*Fundarstjóri: Sólveig Reynisdóttir*

*Framsögumenn: Edda Graichen, formaður Önundarfjarðardeildar  
Dögg Guðmundsdóttir verkefnisstjóri Kópavogsdeild*

### Framsaga og umræður

Framsögumenn sögðu frá starfi Önundarfjarðar- og Kópavogsdeilda. Önundarfjarðardeild hefur frá því snjóflóðin féllu einbeitt sér að uppbyggingarstarfi á svæðinu og aðstoðað fólk í sálrænum erfiðleikum. Þá hefur deildin undanfarin misseri lagt áherslu á fjölmenningsleg verkefni fyrir erlenda og innlenda íbúa með námskeiðahaldi og verkefnum en um þriðjungur íbúa á Flateyri er af erlendum uppruna.

Markmiðið var að:

Efla félagsanda meðal íbúanna á svæðinu

Tengja saman fólk af ólíkum uppruna

Virkja íbúana til þátttöku í félagslífinu.

Styrkja byggðina á svæðinu

Haldin voru matreiðslunámskeið þar sem fólk af ólíkum uppruna leyfði fólki að fylgjast með þegar elduð var kvöldmáltíð. Máltíðirnar sem voru eldaðar áttu uppruna sinn í Þýskalandi, Englandi, Tælandi, Filippseyjum, Póllandi og Íslandi. Deildin lagði út fyrir hráefni í máltíðirnar. Einnig voru haldin dansnámskeið, sundnámskeið, tungumálanámskeið og jóganámskeið. Þá voru ungmenni styrkt til að vinna að kvikmyndagerð og hljóðblöndun með tónlist í svokölluðum tanki. Boðið var upp á námskeiðið Viðhorf og virðingu í tengslum við aðalfund. Þátttakan á námskeiðunum var góð og mætti m.a. fólk utan Flateyrar sem eflir tengsl milli byggðalaga.

Kópavogsdeild hóf í fyrra (2009) verkefni undir yfirskriftinni „Nýttu tímann“ þar sem boðið var upp á fjölbreytt námskeið með það að markmiði að hvetja fólk til að nýta þekkingu sína og reynslu til að halda áfram að vaxa og dafna þrátt fyrir atvinnumissi á erfiðum tímum, að skapa jákvæðar aðstæður fyrir fólk, rjúfa félagslega einangrun og einsemd og að skapa og efla fjölbreytt verkefni fyrir sjálfboðaliða.

Markhópar voru atvinnulausir, þeir sem höfðu þurft að minnka við sig vinnu og þeir sem voru einmana og félagslega einangraðir. Áhersla var á hagnýt námskeið, s.s. fatasaum, fjármálalæsi, ræktun kryddjurta, skapandi skrif og nýsköpun. Leiðbeinendur gáfu vinnu sína.

Verkefnið var unnið í samvinnu við Kópavogsbæ, Vinnuálastofnun, heilsugæslustöðvar, kirkjusóknir, Mæðrastyrksnefnd Kópavogs og Rauðakrosshúsið

Fyrir jólin voru haldin námskeið þar sem þáttakendum var kennt að setja sér markmið til að létta undir fyrir hátíðarnar, útbúa ódýrar jólagjafir, kenndar uppskriftir og hollráð til hamingju. Einnig tók deildin þátt í neyðaraðstoð fyrir jólin í samvinnu við Mæðrastyrksnefnd Kópavogs.

### Niðurstöður

- Að aðstoða og hvetja fólk til að nýta þekkingu sína og reynslu til að halda áfram að vaxa og dafna þrátt fyrir tímabundinn atvinnumissi á erfiðum tímum.
- Að leggja áherslu á hagnýt námskeið fyrir nýja og eldri markhópa skjólstæðinga Rauða krossins s.s. atvinnulausa, þá sem hafa þurft að minnka við sig vinnu og þá sem eru félagslega einangraðir og einmana.
- Að leita í auknum mæli samstarfs við aðila í bæjarfélögum við skipulagningu og framkvæmd verkefna/námskeiða.

### Hvernig náum við til fólks?

*Fundarstjóri: Einar Sigurðsson*

*Framsögumenn: Elfa Dögg Leifsdóttir verkefnisstjóri hjálparsímans 1717*

*Marín Þórsdóttir forstöðukona URKI-R*

*Þóra Björk Nikulásdóttir formaður Stöðvarfjarðardeildar*

### Framsaga og umræður

Í máli framsögumanna kom fram að sýnileiki og öflugt kynningarstarf á starfi Rauða krossins innanlands sem utan er mikilvægt. Leggja þarf áherslu á að samræma kynningarstarf s.s í skólum, í fjölmiðlum og á netinu. Auka þarf kynningarstarf á öllum stigum skóla (frá leikskólum til háskóla).

Aukin ásókn hefur verið í sjálfboðastörf hjá Hjálparsímanum 1717 en auka þarf fjölbreytni í framboði verkefna og auka samstarf á milli deilda í þeim efnum til að halda betur í sjálfboðaliða og leggja í auknum mæli áherslu á stutt hnitmiðuð verkefni í bland við langtímaverkefni.

Þegar á reynir í samfélaginu á Rauði krossinn að þenjast út í starfi en ekki draga saman í starfsemi sinni.

Miklu skipti að deildir hafi húsnaði undir starfsemi sína, sem á minni stöðum þjóna hlutverki félagsmiðstöðva og býður upp á markvissara og öflugra starf hjá deildum.

Rauðakrosshúsið er opið fimm daga vikunnar og mörg verkefni eru þar í gangi.

Stöðvarfjarðardeild hefur kynnt starfsemi sína í skólanum og hjá fyrirtækjum. Deildin er með ungmennastarf fyrir börn á öllum aldri. Þrjóna- og saumahópar koma saman og heimsóknavinir. Litla Rauða kross búðin var opnuð fyrir ári síðan og hefur deildin verið á hvers manns vörum síðan þá þar sem fólk alls staðar af Austurlandi kemur og kaupir föt og lopa. Þar er nóg að gera og ef til vill hefur búðin verið það sem hefur kynnt starf deildarinnar mest og best. Deildin hefur verið dugleg að halda Rauða krossinum að fólki s.s. á vinnustöðum og í grunnskólanum og hvatt fólk til að kíkja við en í húsnaðinu er kaffihorn þar sem fólk getur komið saman. Deildin sendir út fréttabréf um

starfið einu sinni á ári og fer það í hvert hús á Stöðvarfirði. Sem stendur er Rauði krossinn virkasta félagið á Stöðvarfirði og sjálfboðaliðum fjölgar.

Umræður spunnust um sýnileika og kreppu. Vakning hefur orðið á landsvísu en atvinnuleysi úti á landi er minna og því minni breyting. Rauði krossinn þarf að vera opnari og sveigjanlegri og hugsa meira út fyrir rammann. Finna þarf betri leið en netið til að ná til fólks þar sem ekki eru allir eldri borgarar með netið. T.d. að fara á vinnustaði og ná til fólks áður en það fer á eftirlaun – augliti til auglitis. Hafa samband við félög eldri borgara, Tryggingastofnun, félagsþjónustuna, kirkjuna og heilsugæslu og finna sjálfboðaliða; vera í samvinnu við aðra.

Rætt var um að byrja þurfi kynningu á Rauða krossinum strax í leikskólum, þá fái foreldrarnir kynningu, ná þarf til allra aldurshópa, tombólubörnin eru ekta og áhuginn mikill.

Kynna þarf betur innanlandsstarfið og er aðstaðan og hæfir leiðtogar skilyrði.

Víkurdeild Rauða krossins starfar með félagsmiðstöðinni og hefur styrkt hana með tölvukaupum og tækjum.

Deildin gefur börnum hjálma. Námskeiðið Börn og umhverfi er kennt í skólanum og Rauði krossinn styrkir starf eldri borgara.

Sólveig Ólafsdóttir upplýsingafulltrúi sagði að innanlandsstarfið væri vel kynnt, t.d. er í fjölmiðlum kynningin 80% innanlandsverkefni og 20% erlend verkefni.

### **Niðurstöður**

- Rauði krossinn er sterkt vörumerki (annað sterkasta lógó í heimi)
- Aðsetur skiptir miklu máli
- Sveigjanleiki þarf að vera í verkefnavali – fleiri og fjölbreyttari verkefni bæði stutt og löng
- Bæta þarf við fleiri litlum verkefnum ekki langtímaverkefnum.